

《菩薩戒。幽冥戒 誦戒儀軌》

我三寶弟子○○暨菩薩靈魂 一心祈請

娑婆教主，本師釋迦牟尼佛，過去覺華定自在王佛，西方接引阿彌陀佛，當來下生彌勒尊佛，盡虛空遍法界，一切諸佛。惟願，不違本誓，慈光攝照，救拔濟我。（以下儀軌皆三誦三拜）

我三寶弟子○○暨菩薩靈魂 謹運一心，皈依敬禮大小二乘，毗尼律藏，五篇三聚，解脫木叉，十二分經，權實教典，離欲真淨，甚深法寶。

我三寶弟子○○暨菩薩靈魂 一心祈請

幽冥救苦，本尊地藏，觀音勢至，文殊普賢，清淨海眾，諸大菩薩。惟願，不違本誓，慈光攝受，救拔濟我。

我三寶弟子○○暨菩薩靈魂 一心祈請

光明會上，寄位諸天，梵釋四王，天龍八部，護戒善神，金剛力士，閻摩羅王，諸獄主者，伽藍土地，一切靈祇。惟願，不違本誓，慈悲護祐。

（受四不壞信）

我三寶弟子○○暨菩薩靈魂，從今時，盡未來際身，皈依佛，皈依法，皈依僧，皈依戒。

（懺悔過法）

我三寶弟子○○暨菩薩靈魂，若過去，若現在，若未來，身口意十惡罪，願畢竟不起，盡未來際。

（發十四種大願）

假使熱鐵輪，在於頂上旋，終不以此苦，退失所發願。我三寶弟子○○暨菩薩靈魂，從今時，盡未來際身，一、常能念佛，親近善知識。二、常能捨離諸惡知識。三、乃至失命因緣，不犯戒。四、常能讀誦大乘經律，問甚深義。五、常能於無上菩提生信心。六、若見眾生苦惱時，能救護。七、常能隨力供養三寶。八、常能孝順父母敬事師長。九、常能捨諸懈怠，勤求佛道。十、於五塵境上，諸煩惱生時，能制伏心。十一、眾生無邊誓願度。十二、煩惱無盡誓願斷。十三、法門無量誓願學。十四、佛道無上誓願成。

（大乘菩薩十無盡戒）

我三寶弟子○○暨菩薩靈魂，已發菩提心，能持大乘菩薩十無盡戒：一、不得故殺生。二、不得故偷盜。三、不得故婬欲。四、不得故妄語。五、不得故酤酒。六、不得故說四眾過。七、不得故自讚毀他。八、不得故慳惜加毀。九、不得故瞋心不受悔。十、不得故謗三寶。

誦戒功德殊勝行，無邊勝福皆回向。
普願沉溺諸有情，速往無量光佛剎。
十方三世一切佛，諸尊菩薩摩訶薩。
摩訶般若波羅蜜。